
■ **PARAULAS AFRICANAS**

Il salip e la furmia (Nigeria)

Avant lung temp vivevan il salip e la furmia ensemen ed avevan tut quai ch'els basegnavan. Perquai era lur vita er fitg bella. Els n'avessan mai pudì s'imaginar ch'i vegnia ina giada in temp, cur che la segunda mitad da la vita vegnia ad esser plaina da difficultads. Ma ina giada èn els s'accurschids ch'i na gieva betg pli sco adina.

Durant la stad avevan els gì da mangiar en abundanza. Ma la furmia ha gì il presentiment che, cur che la buna stagiun vegnia ad esser a fin, i na vegn betg pli ad esser da mangiar avunda per els. Ella ha avertì il salip ch'i saja da far provisiuns per ina eventuala crisa.

Il salip n'ha betg tadlà sin il cussegl da la furmia. Empè da tegnair si in pau mangiativas per ils dis da plievgia ha el mangià tut quai ch'el aveva. La furmia dentant ha adina mess in pau da la vart. Cur ch'igl è vegnì l'enviern èn tuts restads a chasa, perquai ch'i pluveva e naveva. Tut ils animals sa cuntentavan da mangiar quai ch'els avevan mess da la vart.

Il salip ha cumenzà da dumandar la furmia per da mangiar. Quella al ha gidà, ma al ha er avertì ch'ella na vegnia betg a pudair far quai fitg a la lunga. A la fin è il salip mort da la fom. Perquai di il proverbi: Prendai l'exempel da la furmia e sajas sabis!